



Monsieur Claude Wiseler
Président de la Chambre des
Députés

Lëtzebuerg, den 14 Mee 2024

Här President,

Esou wéi et am Artikel 80 vum Chambersreglement virgesinn ass, biede mir Iech, dës parlamentaresch Fro un d'Madamm Ministesch fir Fuerschung an Héichschoul esou wéi un den Här Minister fir Educatioun, Kanner a Jugend weiderzeleeden.

Den 8. Mee 2024 war op der Internetsäit vum Radio 100,7 een Artikel iwwert d'Offer vun 3 neie Mastergäng fir Enseignant an der Grondschoul op der UNI.lu. Dëst sinn: Master en Sciences de l'éducation – 1) « Gestion et développement des écoles », 2) « Développement de l'enseignement » 3) « Éducation inclusive et accessibilité pédagogique ». An der genauer Beschreibung vun dëse Masterstudiegäng op der Websäit vun der Uni Lëtzebuerg ass explizéiert, dass et sech em Masteren handelt déi fäerdeg Enseignantë kënnen maachen, fir sech an engem Domaine ze spezialiséieren. Desweidere steet an den Zouloosungskrittären « être titulaire d'un Bachelor en sciences de l'éducation de 240 ECTS » oder « être titulaire d'un diplôme d'études supérieures comparable de 240 ECTS préparant à la fonction d'instituteur ».

An deem Zesammenhang wëlle mir follgend Froen un d'Madamm Ministesch fir Fuerschung an Héichschoul an un den Här Minister fir Educatioun, Kanner a Jugend stellen:

- Wéi vill Prozent vun den aktuelle brevetéierten Enseignant an de Lëtzebuerger Grondschoulen erfëllen dës Zouloosungskrittären?
- Déi Enseignant déi hier Formatioun um fréieren ISERP respektiv am Ausland absolvéiert hunn, hunn am Reegelfall ee Bachelor vun 180 ECTS ofgeschloss. Sinn dës Persounen, déi a Lëtzebuerger Grondschoulen enseignéieren, net admissibel? Wat wëll « être titulaire d'un diplôme d'études supérieures comparable de 240 ECTS préparant à la fonction d'instituteur » an deem Fall heeschen ?
- Wa net, gëtt et hei eng Alternative respektiv eng eventuell Passerell oder mussen si dee selwechte Studiegang mat 120 ECTS am Ausland absolvéieren ?


- Bleiwen d'Absolvente vun dësen neie Master-Studiegäng herno ob hiren affektéierte Posten, oder kréie si dono nei Aufgabe resp. nei Missiounen niewent, oder aplaz an der Grondschoul ze enseignéieren ?

Här President, mir bidden Iech eisen déifste Respekt unzehuelen.

Max Hengel



Octavie Modert



Deputéiert

Stéphanie Weydert





Gemeinsam Äntwert vun der Madamm Ministesch fir Fuerschung an Héichschoul an dem Här Minister fir Educatioun, Kanner a Jugend op d'parlamentaresch Fro n°746 vum 14. Mee 2024 vun den honorabelen Deputéierte Max Hengel, Octavie Modert a Stéphanie Weydert

Zum Zäitpunkt vum Rekrutement respektiv der Reprise vum Léierpersonal hu scho mindestens 27 Prozent vun de brevetéierten Enseignanten, déi an den öffentleche Lëtzebuenger Grondschoulen intervenéieren, d'Zouloosungskrittären erfëllt. De reelle Pourcentage vun de Kandidaten, déi d'Zouloosungskrittären erfëllen, ass allerdéngs bedeitend méi héich, vu datt bei der Entrée an d'Karriär eenzeg den Diplom erfaasst gëtt, deen den Accès an d'Funktioon vum Enseignant erméiglecht. D'Erfahrungswäerter am Kontext vun de Rekrutementer vun ënnert anerem den *Instituteurs spécialisés* wéi och d'Demandë fir d'Realisatioun vu Masteraarbechten am schoulesche Kontext, déi beim Ministère fir Educatioun, Kanner a Jugend ugefrot ginn, beleeeën, datt eng Hellewull Enseignanten direkt am Uschloss un hire Studium oder beruufsbegleedend zousätzlech Diplomer absolvéieren an domat och d'Méiglechkeet hunn, fir sech an ee vun de neie Masterstudiegäng anzeschreiwen.

Dat modifizéiert Gesetz vum 27. Juni 2018 iwwert d'Organisatioun vun der Universitët Lëtzebuerg gesäit a sengem Artikel 36, Paragraph 6, ee Minimum vun 300 ECTS fir d'Ausstelle vun engem Masterdiplom vir, d'ECTS, déi am Kader vum Bachelor validéiert goufen, mat abegraff.

De Comité d'accompagnement, deen aus Verrieder vun der Universitët Lëtzebuerg, dem Ministère fir Educatioun, Kanner a Jugend an dem Ministère fir Fuerschung an Héichschoul besteet, ass sech bewosst, datt d'Detenteure vun engem « Certificat d'études pédagogiques » (CEP), also dem Diplom, dee vum fréieren ISERP ausgestallt gouf, oder vun all anerem Diplom vun 180 ECTS, deen op de Beruff vum Enseignant an der Grondschoul virbereet, bedéngt duerch déi gesetzlech Contrainte vum Validéiere vun 300 ECTS fir d'Ausstellen vun engem Master, ouni zousätzlechen Diplom net admissibel si fir déi 3 nei Mastere vun der Universitët Lëtzebuerg. Aktuell gëtt vun de concernéierten Instanzen aktiv no Léisunge gesicht, déi eng Ouverture kéinte schafen, fir den Accès an déi betreffend Masterstudiegäng vun der Universitët Lëtzebuerg ze erméiglechen.

D'Absolvente vun engem vun de Masterstudiegäng hunn d'Méiglechkeet, fir ee Posten als *Instituteur spécialisé* ze briguéieren an dëst a Funktioun vun der Spezialisatioun. Des Weideren hu si och d'Méiglechkeet bei enger *Vacance de poste* eng Kandidatur als Direkter oder stellvertriedenden Direkter ze stellen.

Wéi am Koalitiounsaccord präziséiert, ass d'Schafe vun neie Funktiounen um Masterniveau parallel zu der Redefinitioun vun den Attributiounen an de Responsabilitéite vun de Schoulpresidenten an de Coordinateure geplangt.

Lëtzebuerg, de 24. Juni 2024

D'Ministesch fir Fuerschung an Héichschoul

(s.) Stéphanie Obertin